

Canzun dils treis sogns retgs

Questa canzun deriva da Tujetsch e muossa co ella vegneva cantada pli baul dils Tujetschins en lur agen idiom. Sco umens vegls vulan saver, ei quella canzun dils treis sogns retgs adina vegnida cantada da Buania, da treis buobs che representavan ils treis sogns retgs. Ella Crestomazia dat ei buc ina semeglionta. Quei ei ualti carteivel in product original da Tujetsch.

Partenent la canzun eis ei da dir, ch'ils dus davos vers da mintga strofa vegnan repetiti.

La melodia ei aunc bein enconschenta en Tujetsch.

Tuts:

Nus treis vegnin sco ils sogns retgs

Caspar, Meltger e Baltasar

Per adurar al retg dals retgs

O Jesus, Jesus, Jesus car.

Caspar persuls:

Ju sun Casper al retg nair

E Te ais Jesus al retg vair

A Te miu aur, a Te miu cor

Bugen Te dundel or.

Tuts:

Casper, Meltger e Baltasar

Jesus mon per adurar

Arvan se als lur buccals

Dattan ve als lur regals.

Melcher persuls:

Ju sun Meltger al sacun

Antschains da Saba tut radun

A Te miu Dia carin ju dun

E Tiu survient ju sun.

Tuts:

Casper, Meltger e Baltasar

Jesus mon per salidar

Jesus antschainseschan

Jesus carezeschan

Baltasar persuls:

Baltasar al tier iu sun,

A Te carin ju mira dun

Per me carin Te vul muri

Cun Te ju vi muri.

Tuts:

Casper, Meltger e Baltasar

Nus rugain tier Jesus car,

Tg'el maini era nus sco Vus

A spendri era nus sco Vus.

Amen.